

## Evening Dogri (NSD)

01-05-2024

1. केंद्री गृह मंत्रालय नै दिल्ली ते आले दोआले दे इलाकें च केई स्कूलें च बम दी धमकी गी फर्जी करार दित्ता ऐ। मामले दी जांच जारी।
2. लोकसभा दे त्रीए गेड लेई प्रचार जोरें-शोरें जारी।
3. इस बरे अप्रैल म्हीने जीएसटी दी गराही रिकार्ड 2 लख 10 ज्हार करोड़ रपे दर्ज कीती गई ऐ।
4. भारत नै टारपीडो स्मार्ट पनडुब्बी रोधी मिसाइल प्रणाली दी कामयाब अजमैश कीती।
5. आई.पी.एल एल्लै चेंनई च पंजाब किंग्स ते चिन्नेई सुपर किंग्स बश्कार मकाबला चलै करदा ऐ।

<><><><><><>

### Delhi-School

केंद्री गृह मंत्रालय नै राष्ट्रीय राजधानी ते आले दे इलाके च बक्ख-बक्ख स्कूलें च बम्ब दी धमकी सरबंधी ई-मेल गी अफवाह करार दित्ता ऐ ते बच्चें दे माता-पिता गी अपील कीती ऐ जे ओहू घाबरन नेई। मंत्रालय नै आखेआ ऐ जे दिल्ली पुलिस ते सुरक्षा एजेंसियां इस मामले च लोडचदी जांच कार्रवाई करा करदिआं न।

<><><><><><>

### Campaigning

लोकसभा चुनां दे त्रीए गेड लेई प्रचार जोरें-शोरें कन्नै जारी ऐ। सब्बै पार्टियां मते शा मते मतदाताएं गी अपने पक्खै च करने लेई रोड शो, रैलियां ते जलसे जलूस करा करदे न। प्रधानमंत्री नरेंद्र मोदी ते बीजेपी दे सीनियर लीडर नरेंद्र मोदी होरें अज्ज गुजरात दे बनासकांझा ते साबरकांठा जिले च रैलिंग गी संबोधित कीता। अमित शाह होरें छत्तीसगढ़ दे कोरबा च कांग्रेसी नेता प्रियंका गांधी होरें असम दे धुबरी च समाजवादी पार्टी दे अध्यक्ष अखिलेश यादव होरें मैनपुरी सीट पर खडोती दी डिम्पल यादव दे हक्कै च प्रचार कीता। कांग्रेस दे राष्ट्रीय अध्यक्ष मल्लिकार्जुन खडगे होर राय चूर ते कुलबुर्गी च जनसभाएं गी संबोधित कीता। तोआई उत्तर पूर्वी दिल्ली हल्के थमां अज्ज मनोज तिवारी नै बीजेपी दे मेदवार दे तौरा पर नामांकन दाखल कीता।

<><><><><><>

### GST

अप्रैल म्हीने माल समेयान ते सेवाएं सरबंधी सकल जीएसटी दी गराही च अजे तोड़ी दी सब्बनें शा मती रिकार्ड 2 लख 10 ज्हार करोड़ रपे दर्ज कीती गई ऐ। केंद्री खजाना मंत्रालय दा आखना ऐ जे एहू बाद्दा सलाना विनाह पर 12 इशारिया 4 प्रतिशत ऐ जेडा जे अपने आपै च दिल बधाने आला ते इक रिकार्ड बी ऐ।

<><><><><><>

## UGC-NET

इस बरे होने आले यू.जी.सी नेट दे मतेहान दी तरीक गी अगड़ा पाई दिता गेआ ऐ। हुन एहू मतेयान 16 जून दे बजाय 18 जून गी लैते जाडन। यू.जी.सी नै एहू फैसला मेदवारें थवां थहोई दी प्रतिक्रिया दी पच्छौकडै च लैता गेआ ऐ। यू.जी.सी नै आखेआ ऐ जे एहू मतेयान पूरे मुल्ख च इक्के ध्याडे ओ.एम.आर मोड च लैता जाग। यू.जी.सी-नेट दा मतेयान भारतीय यूनिवर्सिटीज़ ते कॉलेज च असिस्टेंट प्रोफेसर ते जूनियर रिसर्च फेलोशिप लेई लैता जंदा ऐ।

<><><><><><>

## IIMC -Course

भारती जनसंचार संस्था आई.आई.एम.सी नै औंदे शैक्षणिक बरे सोयां 2 नमें एम.ए प्रोग्राम शुरू कीते ना संस्थान नै मीडिया बिजनस स्टडीज़ स्ट्रैटर्जिक कम्प्युनिकेशन च एम.ए गी शैक्षणिक सत्र 2024-25 सोयां 2 बरे दे पाठ्यक्रम दे तौर पर शुरू करने दी घोषणा कीती ऐ। एहू संस्थान दे नमीं दिल्ली परिसर च पढाय जाग ते एहूदे च 40 सीटां उपलब्ध होग।

<><><><><><>

## LPG-Price

तेल कंपनियें फौरी प्रभाव कन्नै कारोबारी रसोई गैस आले सिलेंडर दी कीमत च 19 रपे प्रति सिलेंडर दी कटौती कीती ऐ। इंडियन ऑयल दी वेवसाइट मुजब मूल्य च संशोधन मगरा 19 किलोग्राम दे बिजन सब्सिडी आले कर्मिंशयल एलपीजी सिलेंडर दी खुदरा बिक्री कीमत दिल्ली च इक ज्हार 745 रपे 50 पैसे ऐ। कोलकाता च इक ज्हार 859 रपे, मुम्बई च 1 ज्हार 698 रपे ते चेन्नई च 1 ज्हार 911 रपे होग। हालांकि घरेलू इस्तेमाल आले एलपीजी दी मौजूदा कीमत पैहले आली गै होग।

<><><><><><>

## DG-Akashwani

भारतीय सूचना सेवा दी वरिष्ठ अधिकारी मौसमी चक्रवर्ती होरें अज्ज आकाशवाणी समाचार दी महानिदेशक दे तौरा पर अपना कम्मकार सांबी लैता ऐ। 1991 बैच दी आई.आई.एस अधिकारी मौसमी चक्रवर्ती हुंदे कश पी.आई.बी समेत सूचना ते प्रसारण मंत्रालय दे केई संगठनें च कम्म करने दा तजुर्बा ऐ। त्र'ऊं दहाकें कोला मते असें दे अपने करियर च उनें राश्ट्रीय मानवाधिकार आयोग च कैबिनेट मंत्री दी निजी सचिव दे तौरा पर बी कम्म कीते दा ऐ।

<><><><><><>

## T-SMART

सुपर सोनिक मिसाइल टारपीडो स्मार्ट प्रणाली दी अज्ज बहुलै ओडिशा दे समुंद्री कंडे थमां कामयाब अजमैश कीती गेई। रक्षा मंत्रालय नै आखेआ ऐ जे इस कामयाब अजमैश कन्नै भारती नौसेना दी पनडुब्बी रोधी युद्ध क्षमता हल्के तारपीडो दी छमता कोला केई गुणा बधी जाग। रक्षा मंत्री राजनाथ सिंह होरें इस मौके पर डीआरडीओ ते एहूदे च शामिल उद्योग भ्यालें गी ममारकबाद दिती ऐ।

## Navy-Vice Admiral

वाईस एडमिरल कृष्णा स्वामीनाथन होरें अज्ज नौसेना दे उप-प्रमुख दा औहदा सांभी लैता ऐ। कार्यभार सांभने परैत उनें नमीं दिल्ली च राष्ट्री युद्ध स्मारक पर देसै दी सेवा च सर्वोच्च बलिदान देने आले जांबाजें गी श्रद्धांजलि अर्पित कीती। ओह जुलाई 1987 च भारती नौसेना च नियुक्त कीते गे हे ते ओह संचार ते इलैक्ट्रानिक जंग दे माहिर बी हैन।

<><><><><><>

## Kathua-CASO

सुरक्षा एजेंसिं उधमपुर ते कठुआ जिले च तपाशी अभियान गी व्यापक बनाई दित्ता ऐ। एह तपाशी अभियान उधमपुर जिले च विलेज डिफेंस गार्ड दी हत्या च शामिल आतंकवादी गुटं दी तपाश लेई ऐ। आकाशवाणी जम्मू संवाददाता दी रिपोर्ट मुजब ग्राम रक्षा गार्ड पनाश ग्रं च आतंकवादिं कन्नै होए दे इक लौहके जनेह टाकरे च शहीद होई गेआ हा। पुलस, सेना ते सी.आर.पी.एफ आस्सेआ सांझे तौर पर तपाशी अभियान चलाया गेआ। तपाशी अभियान दा अज्ज चौथा दिन ऐ। एह तपाशी अभियान बसंतगढ़, बनी ते उधमपुर दे सियोज इलाके ते कठुआ च चलाया जा रदा ऐ तां जे आतंकवादिं गी फगड़ेआ जाई सकै पर अजें तगर फरार आतंकवादिं दा पता नेई लग्गा ऐ। पुलस थवां थोई दी जानकारी मुजब आतंकवादिं दा इक गुट उधमपुर जिले दिं उच्चियें धारें पर ते दुआ कठुआ जिले दे बनी, डगार ते किंडली इलाके आली भेठा उठी गेआ ऐ। सुरक्षा बलें उधमपुर ते कठुआ बश्कार आले जंगली इलाके च तपाशी अभियान चलाया ऐ। ड्रोन दी मदद बी लैती जा रदी ऐ। इनें इलाके च बाददू नफरी गी बी तैनात कीता गेआ ऐ। शुरूआती जांच मुजब आतंकवादिं दे 2 गुटें च 4 थवां 6 आतंकवादी होई सकदे न। सुरक्षा बल आतंकवादिं गी फगड़ने लेई हर संभव कोशश करा रदे न। इयां मन्नेआ जा रदा ऐ जे एह आतंकवादी कठुआ जिले थवां बसंतगढ़ पुज्जे।

<><><><><><>

## IMD-Heat

भारती मौसम विभाग नै पच्छिम बंगाल, ओडिशा, बिहार ते झारखंड च कल सख्त गर्मी पौने दी संभावना गी दिखदे होई रेड अलर्ट जारी कीता ऐ। भारती मौसम विभाग नै दस्सेया ऐ जे दक्खन भारत च बी शुक्रवार तगर इस्सै चाल्ली दी दे बने रौहने दी संभावना ऐ। महाराष्ट्र, रायलसीमा, गुजरात, तमिलनाडू ते आंध्र प्रदेश च अगले 5एं दिनें तगर मौसम गर्म ते लू चलने दे असार दस्से गेन। कर्नाटक, केरल ते माहे दे समुंद्री इलाके च गर्मी ते गुम्मे आला मौसम बने दा रौहग। शुक्रवार तोड़ी पच्छिम बंगाल दे गंगा कन्ने लगदे इलाके, पूर्वी झारखंड, उत्तरी ओडिशा ते रायलसीमा च तापमान 47 डिग्री तगर जाई सकदा ऐ। जम्मू-कश्मीर, लद्दाख, गिलगित, बाल्तिस्तान मुजफ्फराबाद, उत्तराखंड ते हिमाचल प्रदेश च 3 कोला 6 मई तगर गर्मी चमकिए बरखा ते बर्फबारी दे बी इमकान न।

<><><><><><>

## Ladakh

लद्दाख च पुलसै नबतलका दे इक बड़े मत कठन पहाडी इलाकें च फंसे दे दऊं विदेशी सैलानिएं गी सुरक्षत बचाई लैता ऐ। एह सैलानी आयरलैंड दे सुलिवन डेरड्रे ते नीदरलैंड दे वान डेर वीजडेन दे बसनीक न जेडे 10 ज्हार 300 फुट दी उंचाई पर फंसी गेदे हे। आपात स्थिति च मदद लेई इनें पुलस कन्ने संपर्क कीता हा जेदे पर खालसी पुलस स्टेशन दे एसएचओ निसार अली दे नेतृत्व च इक बचाव अभियान चलाइए उनेंगी सुरक्षित बचाई लैता।

<><><><><><>

## Actress BJP

फिल्म अभिनेत्री रूपाली गांगुली अज्ज बीजेपी च शामिल होई गेइयां न। नमीं दिल्ली च बीजेपी मुख्यालय च ओ पार्टी महासचिव विनोद तावडे हुंदी मौजूदगी च पार्टी च शामिल होई गेइयां। अज्ज गै मशूर ज्योतिषी अमिया जोशी नै बी बीजेपी दी मिम्बरी लेई लैती। इस्सै दौरान दिल्ली कांग्रेस दे साबका विधायक नीरज बसोया ते नसीब सिं हनै आम आदमी पार्टी कन्ने गठबंधन गी लेइयै पार्टी थमां इस्तीफा देई दित्ता ऐ।

<><><><><><>

## IPL

आई.पी.एल च अज्ज चिन्नेई दे एम.ए चिदंबरम स्टेडियम च चेन्नई सुपरकिंग्स दा मकाबला पंजाब किंग्स कन्ने शुरू होई गेआ ऐ।

एहदे शा पैहले कल रातीं लखनऊ दे एकाना स्टेडियम च लखनऊ सुपर जायंट्स नै मुम्बई इंडियन्स गी 4 विकेटें कन्ने हराई दित्ता। पैहले बल्लेबाजी करदे होई मुम्बई नै लखनऊ सुपर जायंट्स गी जित्त लेई 145 रन्ज दा लक्ष्य दित्ता जेडा मुम्बई इंडियन्स दी टीम नै 20 ओवर पूरे होने कोला 4 गेंदा पैहले गै हासिल करी लैता।

<><><><><><>